

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI KHAMIS : 14 NOVEMBER 2019

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SRI MUSTAPA BIN MOHAMED
[JELI]
TARIKH : 14 NOVEMBER 2019 (KHAMIS)

SOALAN NO. 1

Y.B. DATO' SRI MUSTAPA BIN MOHAMED [JELI] minta **MENTERI KEWANGAN** menyatakan peruntukan tahunan disediakan Kerajaan untuk menyelenggara aset Kerajaan seperti jalan raya, sekolah, hospital, rumah kos rendah di seluruh negara dari 2015 hingga 2019 dan apakah Kerajaan bercadang memberi keutamaan lebih tinggi bagi menyelenggara aset-aset ini.

JAWAPAN

Untuk makluman Ahli Yang Berhormat, peruntukan penyelenggaraan yang sebahagian besarnya merangkumi pelbagai keperluan penyelenggaraan dan pembaikan termasuk menyelenggara aset Kerajaan seperti jalan raya, sekolah, hospital, dan rumah kos rendah di seluruh negara.

Berikut merupakan peruntukan mengurus yang disediakan bagi tujuan pembaikan dan penyelenggaraan dari tahun 2015 hingga 2019:-

PERKARA	2015	2016	2017	2018	2019
	RM(JUTA)				
Penyelenggaraan dan Pembaikan Kecil	9,296	7,862	7,185	7,486	6,234
Bangunan dan Pembaikan Bangunan	670	333	361	174	94
Kemudahan dan Pembaikan Kemudahan	33	24	8	28	16
JUMLAH	9,999	8,219	7,554	7,688	6,344

Kita memfokuskan kepada pembinaan baharu tanpa menyediakan peruntukan yang mencukupi untuk penyelenggaraan aset sedia ada yang menyebabkan aset-aset Kerajaan berada dalam keadaan yang teruk dan uzur. Walau bagaimanapun, Kerajaan akan tetap komited untuk memberi penumpuan dalam aspek penyelenggaraan dan pembaikan melalui dasar 3R iaitu Pembaikan, Penggantian dan Pemulihan (*Repair, Replace and Restore*). Sehubungan dengan ini, peruntukan Perbelanjaan Mengurus untuk membaiki dan menyelenggara aset awam sedia ada ditingkatkan kepada RM10.57 bilion pada tahun 2020 berbanding RM6.34 bilion pada tahun 2019.

**MESYUARAT KETIGA, PENGGAL KEDUA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATO' HAJI AHMAD NAZLAN
BIN IDRIS [JERANTUT]**

TARIKH : 14.11.2019 (KHAMIS)

SOALAN : 2

SOALAN NO. 2

minta **MENTERI PEMBANGUNAN LUAR BANDAR** menyatakan keberkesanan Program Desa Harapan bagi membebaskan masyarakat luar bandar daripada kepompong kemiskinan dan sejauh manakah program ini mampu merapatkan jurang ekonomi antara bandar dan luar bandar.

JAWAPAN

Tuan Yang di-Pertua,

Program Desa Harapan (PDH) merupakan inisiatif baru Kementerian Pembangunan Luar Bandar (KPLB) yang melibatkan penyertaan sektor swasta dan korporat dalam proses pembangunan desa khususnya berkaitan dengan sosio - ekonomi penduduk luar bandar berdasarkan konsep *Corporat Social Responsibility* (CSR).

Program ini akan memberi peluang kepada masyarakat luar bandar untuk meningkatkan sumber aktiviti ekonomi melalui perkongsian strategik dengan syarikat swasta dan korporat.

Sehingga kini, Program Desa Harapan telah dan sedang berjalan secara rintis di tiga buah lokasi iaitu Kampung Kinjang, Chenderiang, Perak, Kampung Kuala Temonyong, Langkawi, Kedah dan Kampung Weng, Baling, Kedah.

Bagi Kampung Kinjang, sebanyak enam buah syarikat telah dan sedang melaksanakan program dan aktiviti seperti pembinaan bangunan tabika oleh Hume Cemboard Industries, program jom kitar semula oleh Berjaya Corporation Berhad dan Program Latihan Keusahawanan Digital oleh Axiata Berhad.

Bagi Kampung Kuala Temonyong, Langkawi, sebanyak 16 syarikat telah dan sedang melaksanakan pelbagai program dan aktiviti seperti sumbangan computer dan peralatan audio visual untuk sekolah Kebangsaan Temonyong dan Pusat Sumber KEMAS, Temonyong oleh EXIM Bank, Program Latihan Jahitan oleh Sri Kandi Skill College (Siti Khadijah Holding Sdn. Bhd.) melalui sumbangan 18 buah mesin jahit dari Berjaya Corporation Berhad, Program Latihan Keusahawanan Digital oleh Axiata Berhad, Program Peningkatan Pendapatan oleh Tenaga Nasional Berhad dan DRB Hicom berhad serta program-program lain dari syarikat lain yang turut terlibat dalam program ini.

Manakala bagi Kampung Weng, Baling pula, program dan aktiviti yang telah dan sedang dilaksanakan oleh rakan strategik PDH seperti Program Latihan Keusahawanan Digital oleh Axiata Berhad, Bengkel

NO. SOALAN : 2

Pengurusan Sisa Pepejal dan Pembuatan Baja Kompos oleh tenaga pakar dari Universiti Kuala Lumpur (UniKL) dan Program Latihan Jahitan oleh Sri Kandi Skill College (Siti Khadijah Holding Sdn. Bhd.) melalui sumbangan 18 buah mesin jahit dari Berjaya Corporation Berhad.

Projek/Program yang dilaksanakan oleh syarikat-syarikat ini secara dasarnya adalah untuk membantu penduduk kampung mengembangkan perusahaan sedia ada di kampung yang sebelum ini diusahakan secara individu kepada skala yang lebih besar iaitu secara berkelompok. Melalui kaedah ini, ia akan dapat membuka lebih banyak peluang pekerjaan kepada penduduk kampung dan akhirnya akan dapat meningkatkan pendapatan sedia ada.

Memandangkan pelaksanaan program Desa Harapan ini masih lagi dalam peringkat awal, keberkesanan program ini masih belum lagi dapat dipastikan kerana Rakan Strategik masih lagi rancak melaksanakan program dan aktiviti di kampung-kampung berkenaan. Tempoh pelaksanaan program ini di setiap lokasi adalah selama dua tahun. Kementerian mensasarkan sekurang-kurangnya tiga buah lagi kawasan akan dipilih untuk menyertai program ini bagi tahun hadapan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN AKMAL NASRULLAH BIN MOHD NASIR
[JOHOR BAHRU]**

TARIKH : 14 NOVEMBER 2019 (KHAMIS)

SOALAN

TUAN AKMAL NASRULLAH BIN MOHD NASIR [JOHOR BAHRU] minta **MENTERI KESIHATAN** menyatakan langkah-langkah penguatkuasaan yang telah diambil ekoran daripada berlakunya peningkatan keluaran produk-produk kosmetik dan kesihatan jenama buatan sendiri di pasaran sejak kebelakangan ini.

JAWAPAN

Tuan Yang di-Pertua,

Aktiviti pengilangan produk-produk kesihatan dan kosmetik dikawal di bawah Akta Jualan Dadah 1952 dan Peraturan-Peraturan Kawalan Dadah dan Kosmetik 1984. Undang-undang ini memperuntukkan bahawa produk-produk kesihatan perlu berdaftar dan bagi kosmetik perlu bernetifikasi terlebih dahulu dengan Pihak Berkuasa Kawalan Dadah (PBKD), Kementerian Kesihatan Malaysia sebelum dikilangkan dan dijual kepada orang awam.

Pengilangan produk-produk kesihatan dan kosmetik hanya dibenarkan dilakukan di kilang-kilang yang dilesenkan oleh KKM bagi menjamin keselamatan produk-produk tersebut digunakan oleh orang ramai.

Kementerian Kesihatan Malaysia (KKM) melalui Bahagian Penguatkuasaan Farmasi sentiasa menjalankan pemantauan dan penguatkuasaan bagi memastikan produk-produk kesihatan dan kosmetik yang dipasarkan di Malaysia berdaftar dengan Pihak Berkuasa Kawalan Dadah (PBKD) sebelum dijual kepada orang awam. Kawalan ini bertujuan untuk memastikan hanya produk yang berkualiti, selamat dan berkesan sahaja dijual untuk kegunaan orang ramai.

Tuan Yang di-Pertua,

Bagi mengekang pengilangan dan penjualan produk kesihatan tidak berdaftar dan kosmetik tidak bernetifikasi, tindakan pemeriksaan dan operasi serbuan secara berterusan dijalankan ke atas premis-premis pengeluar atau penjual berdasarkan pengesahan ke atas aduan yang diterima daripada orang awam. Syarikat atau individu yang didapati mengilang dan menjual produk kesihatan yang tidak berdaftar dan kosmetik tidak bernetifikasi akan disiasat dan didakwa di mahkamah di bawah Akta Jualan Dadah 1952.

Berdasarkan statistik dari tahun 2018 hingga 2019, sebanyak **34,787** unit produk kesihatan tidak berdaftar dan kosmetik tidak bernetifikasi telah dirampas dengan nilai rampasan sebanyak **RM63.1 juta**. Manakala, notifikasi penurunan iklan dan sekatan ke atas laman sesawang dan platform e-dagang juga telah diambil bagi kosmetik dan produk kesihatan yang melanggar undang-undang.

Tuan Yang di-Pertua,

Pelbagai usaha telah dijalankan bagi meningkatkan kesedaran orang awam berkenaan produk kesihatan berdaftar serta kosmetik bernetifikasi melalui pameran, dialog awam, ceramah dan '**Kempen Kenali Ubat Anda**' di seluruh negara. Orang awam juga adalah dinasihatkan agar menyemak produk yang ingin dibeli sama ada ianya berdaftar atau bernetifikasi. Semakan status pendaftaran atau notifikasi sesuatu produk boleh dilakukan dengan melayari laman sesawang **www.npra.gov.my** atau memuat turun aplikasi '**NPRA Product Status**' daripada Google Play Store.

SOALAN NO : 3

Dalam usaha untuk melindungi kesihatan dan kesejahteraan orang awam, Bahagian Penguatkuasa Farmasi (BPF), Kementerian Kesihatan Malaysia sentiasa membuat pemantauan secara berterusan. Orang ramai turut amat digalakkan untuk mengemukakan aduan dan menyalurkan maklumat berkenaan produk kesihatan yang disyaki tidak berdaftar dan kosmetik yang disyaki tidak bernetifikasi kepada BPF, KKM melalui laman sesawang **<http://www.pharmacy.gov.my>** atau mana-mana **Cawangan Penguatkuasa Farmasi** yang berdekatan.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT MESYUARAT KETIGA,
PENGAL KEDUA, PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA DR. MAXIMUS
JOHNITY ONGKILI [KOTA MARUDU]**

TARIKH SOALAN : 14 NOVEMBER 2019 (KHAMIS)

SOALAN NO. 4

Minta **MENTERI PEMBANGUNAN USAHAWAN** menyatakan apakah program-program baru untuk membentuk usahawan-usahawan baru yang berdaya tahan dan kompetitif di kalangan orang asal “natives” di Sabah dan Sarawak. Dari segi rekod pada masa kini berapa jumlah usahawan bumiputera kecil, sederhana dan besar/utama di Sabah dan Sarawak.

JAWAPAN

Yang di-Pertua,

1. Untuk makluman Yang Berhormat, berdasarkan profil Perusahaan Kecil dan Sederhana (PKS) sebanyak 61,036 PKS berdaftar di Sarawak dan sebanyak 55,702 PKS berdaftar di Sabah manakala seramai 46,766 dan 32,377 orang usahawan mikro di Sabah dan Sarawak.

2. Kementerian Pembangunan Usahawan (MED) telah merasionalisasi dan memperkasakan inisiatif/program seperti berikut bagi membentuk usahawan-usahawan baru yang berdaya tahan dan kompetitif di Sabah dan Sarawak:

(i) Program Tunas Usahawan Belia Bumiputera (TUBE) 6.0 oleh SME Corp

Program ini memfokuskan kepada golongan B40 dan luar bandar. Pada tahun 2019, program ini telah dirasionalisasikan semula dan diperkukuhkan dengan penyertaan daripada Orang Asal menerusi pelaksanaan TUBE 6.0. Sehingga Ogos 2019, sejumlah 4,422 belia Bumiputera telah dilatih di bawah program ini. Daripada jumlah tersebut, 408 adalah peserta dari Sarawak manakala 490 adalah peserta dari Sabah.

(ii) Program Million Ringgit Coop League (MiRiCLe) oleh Institut Koperasi Malaysia (IKM)

Merupakan salah satu inisiatif bagi membantu koperasi kluster kecil dan sederhana yang berpotensi membangun dengan lebih terancang melalui tawaran nilai sebagai rakan solusi strategik koperasi. Sebanyak 200 buah koperasi yang berpotensi telah dikenalpasti untuk menyertai program ini. Daripada jumlah tersebut, sebanyak 14 buah koperasi di Sabah dan 17 buah koperasi di Sarawak telah bersetuju menyertai MiRiCLe bagi tahun 2019.

(iii) Program baharu di bawah Professional Training and Education for Growing Entrepreneurs (PROTÉGÉ)

Program PROTÉGÉ *Reach Out* memberikan pendedahan bidang keusahawanan kepada para pelajar dan masyarakat dengan kerjasama Institusi Pengajian Tinggi (IPT). Sehingga 30 Mac 2019, program ini telah dilaksanakan di 14 IPT termasuk di Universiti Malaysia Sarawak (UNIMAS) pada 10 hingga 11 April 2019 dan Universiti Malaysia Sabah (UMS) pada 2 Mei 2019. Siri jelajah fasa II sedang dilaksanakan di 10 Universiti seluruh Malaysia yang telah bermula pada 29 September 2019 yang lalu.

(iv) Program-program PKS oleh SME Bank

Program “*Outreach*” atau sesi bertemu pelanggan dan usahawan baru di peringkat negeri Sabah telah diadakan di Tawau pada 2 Mei 2019 dan Kota Kinabalu pada 3 Oktober 2019 yang menghimpunkan seramai 229 usahawan.

Manakala di peringkat negeri Sarawak, program *outreach* telah dijalankan pada 24 April 2019 yang diadakan di Kuching yang melibatkan 59 syarikat dan 79 pengunjung serta pada 31 Oktober 2019 yang diadakan di Miri yang melibatkan 55 syarikat dan 100 orang pengunjung.

(v) Program keusahawanan oleh INSKEN

Kursus keusahawanan jangka pendek dan program “mentoring/coaching” oleh INSKEN seperti:

- INSKEN Business Coaching: Cafe/Restaurant@Sarawak telah dilaksanakan pada Mei hingga September 2019 dengan penyertaan seramai 25 usahawan;
- INSKEN Business Coaching: Homestay@Sarawak telah dilaksanakan pada Mei hingga September 2019 dengan penyertaan seramai 30 usahawan daripada 14 *homestay*; dan
- INSKEN Business Coaching: SPA@Sabah/Sarawak dan INSKEN Business Coaching: Postnatal@

Sabah/Sarawak dijadual dilaksanakan sebelum penghujung tahun 2019.

(vi) Program-program anjuran MaGIC bersama komuniti tempatan

- a) Kerjasama dengan komuniti tempatan seperti Borneo Startups Community, Borneo Re-Alliance Avenue for Entrepreneurs, Sabah Momspreneur telah dijalankan melalui Youth Co: Lab Bootcamp, Start-up Weekend bersama BoSCo pada Mac 2019 bagi menggalakkan pembangunan usahawan berinovasi di Sabah. Manakala di Sarawak kerjasama dengan Tabung Ekonomi Gagasan Anak Sarawak (TEGAS) telah diadakan pada Mei 2018 dan Koperasi Belia Inovatif Sarawak (KOBIS) pada Mac hingga Mei 2018 untuk memupuk semangat keusahawanan, kesenian dan kebudayaan di kalangan penduduk setempat.
- b) MaGIC juga dalam perbincangan bersama Kementerian Perdagangan dan Perindustrian Sabah bagi membantu mewujudkan Pusat Kreatif Ekonomi dan Inovasi (PKEI) di Sabah.

Sekian, terima kasih

PEMBERITAHUAN PERTANYAAN DEWAN RAKYAT

PERTANYAAN : LISAN
DARIPADA : YB TUAN YAMANI HAFEZ BIN MUSA
[SIPITANG]
TARIKH : 14 NOVEMBER 2019

SOALAN

Minta **MENTERI PELANCONGAN, SENI DAN BUDAYA** menyatakan jumlah hasil pendapatan diperoleh Kerajaan daripada industri pelancongan sepanjang tahun lalu sehingga September ini.

JAWAPAN

Tuan Yang di-Pertua,

Mengikut statistik yang dikeluarkan oleh Kementerian, jumlah hasil pendapatan daripada perbelanjaan pelancong asing bagi tahun 2018 adalah sebanyak **RM84.14 bilion**, meningkat sebanyak **+2.4%** berbanding tahun lepas iaitu **RM82.17 bilion**. Manakala, bagi tempoh **Januari hingga Jun 2019**, sebanyak **RM41.69 bilion** telah dibelanjakan oleh pelancong asing, meningkat sebanyak **+6.8%** berbanding tempoh yang sama tahun lalu iaitu sebanyak **RM39.0 bilion**. Membeli-belah merupakan komponen perbelanjaan terbesar yang mewakili **35.3%** daripada keseluruhan perbelanjaan.

Bagi pelancongan domestik pula, sejumlah **RM92.6 bilion** telah dibelanjakan pada tahun **2018** berbanding **RM83.1 bilion** pada tahun **2017** iaitu **peningkatan** sebanyak **11.4%**.

Sekian, terima kasih.

**PEMBERITAHUAN PERTANYAAN
MESYUARAT KETIGA, PENGGAL KEDUA,
PARLIMEN KEEMPAT BELAS DEWAN RAKYAT**

PERTANYAAN : JAWAB LISAN

**DARIPADA : DATUK WILSON UGAK ANAK
KUMBONG [HULU RAJANG]**

TARIKH : 14.11.2019 (KHAMIS)

SOALAN NO. 6

minta **MENTERI PEMBANGUNAN LUAR BANDAR** menyatakan status Jalan Nanga Melekun ke Rumah Panjang Tunku Sungai Gaat, Baleh, Kapit.

JAWAPAN

Tuan Yang di-Pertua,

Untuk makluman Yang Berhormat, cadangan pelaksanaan Jalan Nanga Melekun ke Rumah Panjang Tunku Sungai Gaat, Baleh, Kapit iaitu dengan tajuk Projek Membina Jalan Dari Nanga Mujong Ke Nanga Gaat Terus Ke Rumah Tunku, Nanga Sebiro, Sg. Gaat, Bahagian Kapit telah dipohon kepada Unit Perancang Ekonomi untuk dilaksanakan di bawah *Rolling Plan* 4, tahun 2020, Rancangan Malaysia Kesebelas (RMKe-11).

Walau bagaimanapun, projek ini tidak diluluskan oleh Kementerian Hal Ehwal Ekonomi (MEA) untuk dilaksanakan pada tahun 2020. Sekiranya terdapat keperluan mendesak untuk projek ini dilaksanakan, Yang Berhormat boleh memohon semula kepada Kerajaan Negeri untuk dimasukkan ke dalam senarai keutamaan negeri atau pun kepada Kementerian secara terus sebelum diangkat kepada Kementerian Hal Ehwal Ekonomi (MEA) untuk kelulusan selanjutnya. Walau bagaimanapun, kelulusan projek ini adalah tertakluk kepada Unit Perancang Ekonomi, Kementerian Hal Ehwal Ekonomi (MEA) dengan mengambil kira kedudukan kewangan semasa negara. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN LIM KIT SIANG
[ISKANDAR PUTERI]**

TARIKH : 14 NOVEMBER 2019 (KHAMIS)

SOALAN NO. 7

TUAN LIM KIT SIANG [ISKANDAR PUTERI] minta **MENTERI KOMUNIKASI DAN MULTIMEDIA** menyatakan kadar ketersambungan bukan internet, surat menyurat, siaran radio dan televisyen, dan telefon talian tetap di petempatan Orang Asli.

JAWAPAN

Tuan Yang di-Pertua,

Bagi menjawab soalan dari Yang Berhormat dari Iskandar Puteri, izinkan saya menjelaskannya berdasarkan beberapa jenis perkhidmatan yang berkaitan bagi Perkampungan Orang Asli.

Perkhidmatan Pos

1. Untuk makluman Ahli Yang Berhormat, berdasarkan semakan yang telah dibuat bersama pihak Pos Malaysia, terdapat hanya satu (1) perkampungan orang asli di kawasan Iskandar Puteri iaitu Kampung Orang Asli Simpang Arang dan jaraknya dengan pejabat pos terdekat untuk mendapatkan pelbagai perkhidmatan adalah seperti berikut:

SOALAN NO : 7

Pejabat Pos (PO)	Alamat	Jarak
PO Gelang Patah	JKR 4891, Jalan Besar, 81550 Gelang Patah, Johor	5.1 km
PO Nusajaya	Aras 1, Siar Jauhar, Bangunan Sultan Ismail, Kota Iskandar Nusajaya, 79000 Johor Bahru, Johor	11.6 km

2. Bagi serahan mel, ianya dilakukan kepada pusat serahan kelompok (*call point*) di rumah Ketua Masyarakat di kawasan tersebut iaitu Batin Noreen Kasi. Serahan dilakukan sebanyak tiga (3) kali seminggu berdasarkan kekerapan jumlah surat.

3. Manakala bagi serahan item pos laju pula, ianya dilakukan secara terus kepada penerima kerana terdapat nombor telefon penerima yang boleh dihubungi melalui nota konsainan yang dihantar oleh Pengirim.

Perkhidmatan Telekomunikasi

4. Pihak Kerajaan sentiasa melaksanakan pelbagai inisiatif untuk meningkatkan liputan telekomunikasi di kawasan luar bandar termasuklah di kawasan perkampungan Orang Asli.

5. Sehingga kini, pihak Kerajaan telah membina 92 menara komunikasi baharu yang beroperasi di sekitar kawasan perkampungan Orang Asli di seluruh negara.

6. Selain itu, tambahan 6 menara masih dalam peringkat pelaksanaan yang dijangka siap sepenuhnya pada suku keempat 2019 yang terletak di sekitar perkampungan Orang Asli.

7. Proses penambahbaikan kualiti perkhidmatan komunikasi di kawasan luar bandar termasuklah perkampungan Orang Asli adalah proses yang berterusan dari semasa ke semasa.

Siaran Radio dan Televisyen

8. Bagi akses siaran platform di Radio Televisyen Malaysia pula, masyarakat Orang Asli telah mula menerima siaran radio sejak Siaran Orang Asli ditubuhkan pada 3 Februari 1959 lagi, menerusi gelombang pendek kebangsaan yang boleh diakses di seluruh negara. Daripada siaran setengah jam, Siaran Orang Asli yang kini dikenali sebagai ASYIKfm bersiaran selama 15 jam setiap hari. RTM sentiasa menambah baik kadar tembusan akses radio ini, ASYIKfm kini boleh didengari menerusi 6 frekuensi FM meliputi kawasan Ulu Tembeling, Lembah Klang, Johor, Pahang Barat dan Cameron Highland.

9. Selain frekuensi FM, RTM turut menawarkan siaran ASYIKfm melalui aplikasi RTM Mobile, Internet Radio *streaming* dan siaran radio menerusi saluran TV NJOI Astro di saluran 875 serta saluran MyFreeview. Dengan adanya akses menerusi saluran Astro NJOI dan MyFreeview ini, siaran ASYIKfm kini telah meliputi seluruh negara.

10. Manakala bagi akses siaran TV, saluran-saluran RTM seperti TV1, TV2, TV Okey dan Saluran Percubaan Berita kini boleh diakses secara 100 peratus di seluruh negara menerusi platform digital MyFreeview melalui inisiatif Pendigitalan Penyiaran Nasional.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. USTAZ HAJI AHMAD MARZUK BIN SHAARY
[PENGKALAN CHEPA]
TARIKH : 14 NOVEMBER 2019 (KHAMIS)

SOALAN NO. 8

Y.B. TUAN AHMAD MARZUK BIN SHAARY [PENGKALAN CHEPA] minta **MENTERI KEWANGAN** menyatakan apakah langkah yang diambil bagi mengatasi masalah kejatuhan nilai Ringgit Malaysia berbanding mata wang asing dan berapa banyak rizab wang asing yang telah digunakan untuk mempertahankan nilai ringgit pada tahun ini.

JAWAPAN

Yang di-Pertua,

1. Sehingga 6 November 2019, nilai ringgit telah menyusut sebanyak 0.1 peratus. Prestasi ringgit adalah sejajar dengan pergerakan kebanyakan mata wang serantau lain yang telah berubah nilai dalam lingkungan -4 peratus dan 6.7 peratus berbanding dolar Amerika Syarikat (AS). Penyusutan nilai ringgit disebabkan oleh ketidaktentuan berkaitan perkembangan geopolitik, kemerosotan sentimen pelabur dalam pasaran kewangan dunia berikutan kelemahan unjuran pertumbuhan global serta kebimbangan bon Kerajaan Malaysia dikeluarkan daripada World Government Bond Index (WGBI) oleh FTSE Russell yang menyebabkan aliran keluar dana asing.
2. Dalam keadaan pasaran kewangan global yang tidak menentu, kadar pertukaran ringgit yang fleksibel memainkan peranan penting sebagai penyerap kejutan luaran tanpa menjejaskan aktiviti ekonomi domestik. Namun begitu, volatiliti ringgit yang ketara boleh menjejaskan aktiviti ekonomi berikutan kesukaran sektor perniagaan dan perindustrian merancang strategi dan mengambil keputusan yang wajar. Sehubungan itu, Kerajaan melalui Bank Negara Malaysia (BNM) sentiasa memastikan keadaan pasaran kewangan lebih lancar dan mengambil langkah proaktif dengan memperkenalkan langkah untuk memastikan kecairan mencukupi, pasaran yang berdaya tahan dan mengurangkan aktiviti spekulasi dalam pasaran.

Yang di-Pertua,

3. Langkah ini termasuk menetapkan syarat supaya sebahagian besar daripada hasil eksport dalam mata wang asing ditukarkan kepada ringgit

NO SOALAN : 8

bagi meningkatkan mudah tunai wang asing dalam pasaran dalam negeri dan meningkatkan penguatkuasaan ke atas peraturan tukaran asing sedia ada bagi mencegah aktiviti spekulasi mata wang ringgit diniagakan di luar pesisir. Pada masa sama, BNM telah memperkenalkan instrumen pelindung nilai (*hedging instruments*) dan menyediakan fleksibiliti agar peserta pasaran kewangan dan sektor perniagaan boleh melaksanakan pengurusan risiko pendedahan mata wang asing dengan lebih baik.

4. Paras rizab antarabangsa negara pula dijangka mengalami peningkatan semula selepas pasaran dunia kembali pulih dan sentimen pelabur bertambah baik. Peningkatan rizab antarabangsa negara akan dijana melalui lebih penerimaan pertukaran wang asing yang dipengaruhi oleh kegiatan teras ekonomi negara yang berterusan serta kekukuhan pasaran kewangan domestik dan antarabangsa. Sekiranya pertumbuhan ekonomi negara kekal kukuh dan kegusaran pelabur asing terhadap faktor luaran kembali reda, lebih penerimaan pertukaran wang asing akan terhasil melalui perkara-perkara seperti berikut:
- a. peningkatan hasil barangan eksport negara yang akan menambahkan lebih dagangan;
 - b. peningkatan pelaburan langsung asing dalam sektor ekonomi negara yang akan membawa masuk aliran modal daripada pertukaran wang asing; dan
 - c. pelaburan portfolio pelabur-pelabur asing yang didorong oleh pertumbuhan dan kestabilan ekonomi global dan domestik.

Yang di-Pertua,

5. Bagi memastikan keadaan pasaran yang teratur dan cekap, Kerajaan melalui Bank Negara Malaysia mengurus aliran dana keluar masuk negara supaya kekal dalam keadaan yang stabil di samping memastikan rizab antarabangsa negara berada pada paras yang mencukupi. Langkah

NO SOALAN : 8

ini akan mendorong peningkatan keyakinan pelabur asing terhadap Malaysia sebagai salah satu destinasi pilihan untuk pelaburan. Paras rizab antarabangsa pada akhir bulan Januari 2018 berjumlah USD103.6 bilion dan mencatat penurunan sebanyak USD2.2 bilion kepada USD101.4 bilion pada 31 Disember 2018. Sementara itu, pada 31 Oktober 2019, paras rizab antarabangsa telah meningkat kepada USD103.2 bilion, mencukupi untuk membiayai 7.6 bulan import tertangguh dan 1.1 kali hutang luar negeri jangka pendek.

6. Dalam jangka masa panjang, nilai ringgit dan rizab negara akan didorong terutamanya oleh kekuatan asas ekonomi negara. Oleh yang demikian, Malaysia perlu menumpukan usaha untuk meningkatkan daya tahan ekonomi dengan mempelbagaikan sumber ekonomi, memperkukuh daya saing ekonomi dan kedudukan fiskal negara.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN KARUPAIYA A/L MUTUSAMI
[PADANG SERAI]**

TARIKH : 14 NOVEMBER 2019 (KHAMIS)

SOALAN

TUAN KARUPAIYA A/L MUTUSAMI [PADANG SERAI] minta **MENTERI KESIHATAN** menyatakan untuk membuat satu kajian penyelidikan terhadap klinik-klinik desa untuk menaikkan taraf, menyediakan kelengkapan peralatan perubatan dan bilik-bilik rawatan yang khas bagi kegunaan pegawai-pegawai perubatan untuk merawat pesakit. Bilik perubatan dan rawatan harus diperbesarkan khususnya bagi setiap klinik desa kerana bilangan pesakit semakin bertambah dari hari ke hari.

JAWAPAN

Tuan Yang di-Pertua,

Kementerian Kesihatan Malaysia (KKM) sentiasa memantau keperluan untuk menaik taraf klinik-klinik desa (KD) dari semasa ke semasa dan ianya dibuat secara berfasa bergantung kepada keperluan populasi setempat. Populasi di kawasan Padang Serai adalah seramai 77,000 penduduk meliputi tiga (3) klinik desa di bawah penyeliaan Klinik Kesihatan Padang Serai. Klinik Desa di sekitar Padang Serai mempunyai purata jarak di antara 6km hingga 9km dengan Klinik Kesihatan (KK) Padang Serai. Penduduk setempat boleh mendapat perkhidmatan di KK Padang Serai yang mempunyai seorang Pakar Perubatan Keluarga, 9 orang Pegawai Perubatan, 5 orang Penolong Pegawai Perubatan, 13 orang Jururawat Terlatih dan 10 Jururawat Masyarakat.

SOALAN NO : 9

Manakala di Klinik Desa pula, KKM menempatkan sejumlah 2 orang Jururawat Masyarakat yang bertugas memberi perkhidmatan ibu dan anak. Purata kedatangan KD Guar Lobak adalah 15 hingga 16 orang sehari, KD Sidam Kanan seramai 10 hingga 11 orang sehari dan KD Permatang Durian pula seramai 46 hingga 47 orang sehari yang merangkumi kes-kes antenatal, kanak-kanak, perancang keluarga dan pesakit luar.

Pembesaran bilik-bilik rawatan dan keperluan kepada peralatan perubatan adalah berdasarkan keperluan di klinik desa yang berkaitan. Pertambahan peralatan perubatan amat penting dalam mengimbangi pertambahan populasi, kedatangan pesakit ke klinik desa dan pertambahan perkhidmatan yang disediakan. Sehubungan dengan itu, KKM sentiasa prihatin terhadap keperluan untuk meningkatkan fasiliti di KK selari dengan hasrat KKM untuk memastikan rakyat dapat menikmati kemudahan kesihatan yang sempurna.

Sekian, terima kasih.

**PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN NIK MOHAMAD ABDUH
BIN NIK ABDUL AZIZ (BACHOK)**

TARIKH : 14 NOVEMBER 2019 (KHAMIS)

SOALAN

TUAN NIK MOHAMAD ABDUH BIN NIK ABDUL AZIZ (BACHOK) minta **MENTERI KOMUNIKASI DAN MULTIMEDIA** menyatakan sejauh mana laman web Sebenarnya.my diakses oleh rakyat di negara ini bagi mengesahkan sesuatu isu sama ada palsu atau tidak.

JAWAPAN

Tuan Yang Dipertua,

1. Untuk makluman Ahli Yang Berhormat, portal *Sebenarnya.my* yang telah dilancarkan oleh SKMM pada Mac 2017 sehingga kini masih menjadi salah satu sumber rujukan bagi orang ramai bagi menentukan kesahihah sesuatu berita yang tular. Sehingga kini, portal tersebut menerima lebih 70 juta layaran semenjak dilancarkan dan secara purata menerima sekitar 2.4 juta “hits” setiap bulan. Selain itu, Portal Sebenarnya.my juga telah menerima sebanyak 3,361 penyaluran maklumat daripada orang awam (maklumat mengenai berita yang tidak ditentusahkan kesahihannya.)

2. Aduan awam berkenaan kandungan/berita palsu juga telah meningkat sebanyak 55%, dari tahun 2018 iaitu sebanyak 340 aduan, dan 527 aduan pada 2019 sehingga September. Peningkatan aduan yang diterima menunjukkan masyarakat awam lebih peka dan

peningkatan kesedaran dengan sebaran-sebaran maklumat yang tidak pasti atau tidak disahkan kesahihannya. Pemerhatian dari aspek perkongsian maklumat daripada sumber portal *Sebenarnya.my* oleh masyarakat awam di media-media sosial memberi indikasi yang positif dari segi keberkesanan portal di dalam membantu menangani masalah penularan maklumat serta berita yang tidak sahih atau palsu dalam talian.

3. Pihak Kementerian melalui SKMM baru-baru ini juga telah menghubungkan semula jalinan kerjasama antara berbilang agensi melalui “Jawatankuasa Operasi Pengurusan Berita yang Tidak Ditentusahkan Dalam Talian” yang telah ditubuhkan bagi menyelaraskan koordinasi dalam menguruskan kandungan atau berita palsu. Melalui jalinan kerjasama tersebut, agensi yang terlibat telah memainkan peranan dengan mengesan dan memantau penularan berita/maklumat yang tidak benar yang timbul atau menular (viral), seterusnya mengeluarkan kenyataan menjelaskan atau menafikan sebarang berita palsu dan mengelirukan melibatkan agensi dan Kementerian masing-masing.

4. Kenyataan-kenyataan penafian atau penjelasan yang dibuat akan diterbitkan dalam portal *sebenarnya.my* sebagai repositori kepada berita-berita yang telah ditentusahkan dan untuk menjadi sumber rujukan bagi orang ramai menentusahkan sesuatu berita yang tular. Di samping itu, pelbagai program advokasi dan kesedaran telah dijalankan pihak SKMM di media dan di lapangan bagi menyokong inisiatif portal *Sebenarnya.my*, memupuk kesedaran awam mengenai gejala berita palsu, serta pembudayaan amalan menyemak dan menentusahkan sesuatu berita.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. HAJI ABD. LATIFF BIN AHMAD
[MERSING]**

TARIKH : 14 NOVEMBER 2019 (KHAMIS)

SOALAN

DATUK DR. HAJI ABD. LATIFF BIN AHMAD [MERSING] minta **MENTERI KESIHATAN** menyatakan bilakah Kementerian Kesihatan bersedia untuk mengkaji tempoh latihan 'housemanship' dari dua tahun kepada setahun.

JAWAPAN

Tuan Yang di-Pertua,

Majlis Perubatan Malaysia (MMC) adalah sebuah badan regulatori yang ditubuhkan di bawah Akta Perubatan 1971. Seseorang graduan perubatan warganegara Malaysia atau pasangan warganegara Malaysia yang ingin menjalani latihan siswazah di fasiliti Kementarian Kesihatan Malaysia wajib berdaftar dengan MMC selaras dengan Seksyen 12 Akta Perubatan Malaysia. Jawatankuasa Pendidikan Perubatan (Medical Education Committee) MMC sedang dalam proses mengemaskini '*Standards*' untuk latihan siswazah. Selepas '*Standards*' tersebut diluluskan oleh MMC, Jawatankuasa Latihan Siswazah MMC akan mengkaji semula tempoh masa latihan siswazah tersebut sama ada Pegawai Perubatan Siswazah dapat mencapai '*Standards*' tersebut dalam masa setahun. Pada masa ini MMC masih mengekalkan tempoh latihan bagi Pegawai Perubatan Siswazah selama 2 tahun.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SRI HASAN BIN ARIFIN
[ROMPIN]
TARIKH : 14 NOVEMBER 2019 (KHAMIS)

SOALAN NO. 12

Y.B. DATO' SRI HASAN BIN ARIFIN [ROMPIN] minta **MENTERI KEWANGAN** menyatakan berapa peratus kelulusan pinjaman perumahan bagi pemohon tahun 2015 hingga Mac 2019.

JAWAPAN

Tuan Yang di-Pertua,

Para pembeli rumah yang layak akan terus mendapat akses kepada pinjaman perumahan. Bagi tempoh 2015 hingga 2018, kadar kelulusan pinjaman perumahan purata bagi peminjam berumur 30 hingga 40 tahun ialah 76%. Kadar ini kekal stabil pada paras 75% daripada Januari sehingga Mac 2019. Secara keseluruhan, kadar kelulusan bagi pinjaman perumahan baharu kekal tinggi pada 75% setakat Mac 2019 (Disember 2018: 76%).

Peminjam berumur 30 hingga 40 tahun merupakan kumpulan peminjam terbesar berbanding kumpulan-kumpulan umur yang lain, merangkumi 43% daripada jumlah keseluruhan pinjaman perumahan baharu setakat Mac 2019. Sebilangan besar iaitu 64% merupakan pembeli rumah berharga di bawah RM500,000.

Secara amnya, bank hanya menolak permohonan pinjaman perumahan sekiranya peminjam mempunyai tahap pinjaman sedia ada yang tinggi, latar belakang dan pengurusan kredit yang lemah serta tidak mempunyai dokumen pendapatan yang mencukupi untuk menyokong keupayaan membayar balik pinjaman.

Dalam usaha untuk meningkatkan kadar pemilikan rumah di Malaysia, adalah penting untuk memastikan tahap keberhutangan para peminjam berada pada paras yang terkawal dan rakyat tidak dibebani dengan hutang yang berlebihan.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK SERI DR. RONALD KIANDÉE
[BELURAN]**

TARIKH : 14 NOVEMBER 2019

SOALAN

Datuk Seri Dr. Ronald Kiandee [Beluran] minta **MENTERI LUAR NEGERI** menyatakan sejauh manakah kenyataan oleh Setiausaha Hal Ehwal Luar Filipina yang mengesahkan semula tuntutan negara tersebut ke atas Sabah memberikan kesan terhadap hubungan dua hala Malaysia dengan Filipina dan apakah langkah yang diambil oleh Kerajaan bagi membendung berlakunya tuntutan-tuntutan tidak berasas seperti ini dari terus berlaku.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Beluran atas pertanyaan yang dikemukakan.

Tuan Yang di-Pertua,

2. Seperti yang telah dimaklumkan di Dewan yang mulia ini sebelum ini, Kerajaan Malaysia menolak sekeras-kerasnya apa-apa kenyataan oleh mana-mana pihak berhubung tuntutan ke atas Sabah. Malaysia telah menegaskan bahawa kita tidak mengiktiraf dan tidak akan melayan sebarang bentuk tuntutan oleh mana-mana pihak ke atas Sabah, kerana Sabah adalah sebahagian daripada Malaysia.

3. Fakta ini sudah lama diiktiraf oleh Pertubuhan Bangsa-bangsa Bersatu (PBB) serta komuniti antarabangsa sejak pembentukan Persekutuan Malaysia pada 16 September 1963. Kerajaan Malaysia juga bersedia untuk mengambil tindakan tegas terhadap mana-mana pihak yang cuba mencemar kedaulatan negara ini.

4. Setiap kali isu ini dibangkitkan, Kementerian Luar Negeri terus mengambil tindakan tegas mempertahankan kedaulatan negara termasuklah memanggil TYT Duta Besar Filipina dan mengemukakan nota bantahan bagi menzahirkan bantahan rasmi Kerajaan. Selain itu, Kementerian Luar Negeri juga telah membuat kenyataan akhbar bagi menegaskan pendirian Kerajaan Malaysia yang menolak sekeras-kerasnya sebarang kenyataan mengenai tuntutan ke atas Sabah.

Tuan Yang di-Pertua,

5. Malaysia juga telah mengingatkan pihak-pihak yang terlibat bahawa kecederungan menimbulkan isu ini berpotensi untuk menjejaskan hubungan dua hala yang baik dan menguntungkan yang dinikmati antara Malaysia dan Filipina. Walau bagaimanapun, Malaysia tetap menghargai hubungan dengan Filipina sebagai negara jiran dan rakan anggota ASEAN, di samping rakan anggota lain-lain organisasi serantau dan antarabangsa.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB TUAN ABDUL LATIFF BIN ABDUL RAHMAN
KAWASAN : KUALA KRAI
TARIKH : 14 NOVEMBER 2019 (KHAMIS)

SOALAN :

YB TUAN ABDUL LATIFF BIN ABDUL RAHMAN minta **MENTERI KERJA RAYA** menyatakan apakah jalan penyelesaian yang komprehensif pihak Kementerian untuk mengatasi masalah kesesakan di tol Gombak yang tidak berkesudahan terutama setiap kali musim perayaan dan cuti sekolah.

JAWAPAN :

Tuan Yang Di-Pertua,

Untuk makluman Ahli Yang Berhormat, peningkatan jumlah trafik mendadak menjadi penyumbang kesesakan yang berlaku yang mana statistik menunjukkan purata trafik harian di lebuhraya Kuala-Lumpur Karak adalah sebanyak 89,000 dan meningkat kepada 130,000 (46% peningkatan trafik) ketika hujung minggu, 165,000 (85% peningkatan trafik) ketika cuti panjang, dan 230,000 (158% peningkatan trafik) pada musim perayaan. Antara faktor lain dikenali pasti yang menyumbang kepada kesesakan di Lebuhraya KL-Karak juga adalah disebabkan keadaan muka bentuk bumi yang berbukit/ berselekoh, cuaca hujan dan kemalangan menyebabkan kenderaan bergerak perlahan.

Bagi mengurangkan isu kesesakan yang berlaku plaza tol, pihak konsesi lebuhraya telah melaksanakan tindakan penyelesaian jangka pendek berikut di tapak:-

- 1) Memastikan semua lorong plaza tol dibuka secara maksimum iaitu 12 lorong selain turut menyediakan lorong tambahan (manual) mengikut keperluan operasi;
- 2) Menambah kakitangan operasi tol bagi membantu pengguna yang mempunyai masalah di lorong tol selain menyediakan portable reader bagi membantu mempercepatkan transaksi pengguna;
- 3) Menutup operasi tambah nilai di lorong bagi mengurangkan masa menunggu (waiting time) di plaza tol khususnya semasa kesesakan;
- 4) Mewujudkan Travel Time Advisory (TTA) bagi memberi panduan dan nasihat kepada pengguna lebuhraya merancang perjalanan bagi mengelakkan trafik di jangka pada waktu puncak;

5) Penggunaan VMS / HIS secara konsisten untuk memberitahu pengguna mengenai keadaan semasa di lebuhraya supaya pengguna dapat merancang perjalanan mereka dan juga untuk meningkatkan kesedaran pengguna mengenai Tambah Nilai 'Touch n Go' sebelum memasuki lebuhraya;

6) Pembukaan lorong RFID di plaza tol Gombak dan Bentong untuk melancarkan transaksi trafik di plaza tol dan meminimakan kesesakan.

Untuk makluman, sebagai tindakan penyelesaian jangka panjang kepada isu kesesakan ini, syarikat konsesi lebuhraya telahpun melantik pakar bagi melaksanakan kajian trafik termasuklah cadangan pelebaran lorong dilebuhraya Kuala-Lumpur Karak yang akan dikemukakan kepada pihak Kerajaan dalam masa terdekat.

Selain itu, pihak kerajaan juga kearah pelaksanaan sistem baru iaitu sistem Aliran Bebas Pelbagai Lorong (MLFF) yang sedang dalam kajian dan akan dilaksanakan secara berperingkat di semua plaza tol bagi memudahkan pengguna jalan raya tidak perlu beratur panjang dan tidak perlu memperlahankan kenderaan apabila melalui lorong MLFF sekaligus mengatasi masalah kesesakan yang berlaku.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN NOOR AMIN BIN AHMAD
[KANGAR]
TARIKH : 14 NOVEMBER 2019 (KHAMIS)

SOALAN NO. 15

Y.B. TUAN NOOR AMIN BIN AHMAD [KANGAR] minta **MENTERI KEWANGAN** menyatakan apakah status rundingan ambil alih tol daripada Gamuda Bhd. setakat ini.

JAWAPAN

Tuan Yang di-Pertua,

YAB Perdana Menteri Tun Dr Mahathir Mohamad pada 23 Februari 2019 telah mengumumkan cadangan untuk mengambil alih empat konsesi lebuhraya bertol iaitu Lebuhraya Damansara Puchong (LDP), Sistem Penyuraian Trafik KL Barat (SPRINT), Lebuhraya Shah Alam (KESAS) dan Terowong SMART (SMART). Cadangan tersebut telahpun diluluskan secara prinsip oleh Jemaah Menteri pada 27 Februari 2019.

Hasil daripada usaha rundingan dalam tempoh beberapa bulan yang lepas, Kementerian Kewangan telah memberikan tawaran rasmi bersyarat pada 21 Jun 2019 kepada keempat-empat syarikat konsesi tersebut setelah mendapatkan kelulusan YAB Perdana Menteri atas tawaran tersebut pada 20 Jun 2019. Tawaran bersyarat tersebut adalah tertakluk kepada kelulusan Jemaah Menteri serta pemegang saham dan pemiutang empat syarikat konsesi lebuhraya tersebut.

**MESYUARAT KETIGA, PENGGAL KEDUA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATO' SRI BUNG MOKTAR BIN
RADIN [KINABATANGAN]**

TARIKH : 14.11.2019 (KHAMIS)

SOALAN NO. 16

minta **MENTERI PEMBANGUNAN LUAR BANDAR** menyatakan status apakah perancangan pihak Kementerian dalam membantu rakyat miskin membaik pulih rumah-rumah yang daif ataupun usang serta membina baru rumah bagi penduduk yang masih tidak memiliki rumah di kawasan pedalaman di kawasan Parlimen Kinabatangan.

JAWAPAN

Tuan Yang di-Pertua,

Sebagaimana yang Yang Berhormat maklum, Kementerian Pembangunan Luar Bandar (KPLB) sangat komited dalam membantu rakyat di luar bandar untuk mendapatkan kediaman yang lebih selesa di bawah Program Perumahan Rakyat Termiskin (PPRT). Setiap tahun Negeri Sabah antara negeri yang mendapat peruntukan yang besar untuk pelaksanaan PPRT.

Bagi tahun 2019, Negeri Sabah telah diperuntukkan sebanyak RM57.0 juta (iaitu 28.5% daripada peruntukan keseluruhan RM200 juta) bagi pelaksanaan 445 unit bina baharu dan 1,730 unit baik pulih. Daripada jumlah tersebut, Parlimen Kinabatangan telah mendapat sebanyak RM3.93 juta bagi pelaksanaan 194 unit PPRT iaitu 24 unit bina baharu dan 170 unit baik pulih.

Bagi tahun 2020, Negeri Sabah telah diperuntukkan sebanyak RM73.97 juta (iaitu 28% daripada peruntukan keseluruhan RM264.194 juta) bagi pelaksanaan 630 unit Bina Baharu dan 1,550 unit Baik Pulih. Bagi agihan peruntukan dan unit untuk daerah-daerah di Sabah termasuk Parlimen Kinabatangan akan ditentukan kemudian setelah perbincangan bersama Kerajaan Negeri Sabah.

Kementerian ini akan mempertimbangkan semua permohonan golongan miskin dan miskin tegar yang layak untuk mendapat bantuan PPRT sama ada baik pulih mahupun bina baharu. Walau bagaimanapun, kelulusan adalah tertakluk kepada syarat yang ditetapkan dan peruntukan sedia ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN JONATHAN BIN YASIN
[RANAU]
TARIKH : 14 NOVEMBER 2019 (KHAMIS)

SOALAN NO. 17

Y.B. TUAN JONATHAN BIN YASIN [RANAU] minta **MENTERI KEWANGAN** menyatakan berapa jumlah 40% hasil Sabah yang sepatutnya dikembalikan oleh Kerajaan Persekutuan kepada Negeri Sabah mengikut Perlembagaan Persekutuan. Berikan perincian mengikut tahun sejak 1963 hingga 2018.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan Persekutuan telah mengemukakan cadangan amaun baharu Pemberian Khas untuk tempoh 5 tahun mulai 2020 sehingga 2024, selaras dengan peruntukan Perkara 112D Perlembagaan Persekutuan melalui surat bertarikh 10 Oktober 2019, kepada Kerajaan Negeri Sabah untuk dipertimbangkan.

Kerajaan Persekutuan akan mengambil tindakan selanjutnya setelah Kerajaan Negeri Sabah mengemukakan maklum balas secara bertulis berhubung cadangan tersebut.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : DATO' TAKIYUDDIN BIN HASSAN [KOTA BHARU]

TARIKH : 14 NOVEMBER 2019 [KHAMIS]

SOALAN NO. 18

Minta **MENTERI PERUMAHAN DAN KERAJAAN TEMPATAN** menyatakan apakah justifikasi pihak Kerajaan ingin menjual rumah mewah kepada warga asing terutamanya pembeli dari China dan Hong Kong menerusi program Malaysia Rumah Keduaku (MM2H).

JAWAPAN

Tuan Yang di-Pertua,

1. Untuk makluman Yang Berhormat, berdasarkan data Pusat Maklumat Harta Tanah Negara (NAPIC) Suku Kedua 2019, terdapat 4,213 (12.8%) unit rumah mewah berharga RM1 juta ke atas dengan nilai RM8.3 bilion tidak terjual di negara ini. Sehubungan itu, penjualan rumah mewah kepada warga asing dapat mengurangkan lambakan unit rumah sedia ada serta menggalakkan pertumbuhan ekonomi secara keseluruhannya.
2. Isu mengenai penjualan rumah mewah kepada warga asing di China dan Hong Kong telahpun dijelaskan dalam kenyataan media bertarikh 12 September 2019 di mana China dan Hong Kong dipetik sebagai contoh antara negara yang boleh disasarkan memandangkan harga purata hartanah di negara tersebut adalah tinggi.
3. Selain itu, berdasarkan transaksi jual beli harta tanah kediaman yang dikeluarkan oleh NAPIC sehingga kini (Jan 2019 – Jun 2019), jumlah pemilikan rumah oleh warga asing adalah amat rendah dengan jumlah sebanyak 398 orang (0.4%), berbanding pemilikan oleh warga Malaysia iaitu 99,524 orang (99.6%). Secara keseluruhan, transaksi ini menunjukkan pasaran harta tanah kediaman bagi warga asing masih terkawal.
4. Program Malaysia Rumah Keduaku (MM2H) telah mula diperkenalkan pada tahun 1996 sebagai *Silver Hair Programme* dan dijenamakan semula sebagai MM2H pada tahun 2002. Program ini diperkenalkan oleh Kerajaan bagi membenarkan warga asing yang berkelayakan untuk menetap di Malaysia dengan Pas Lawatan Sosial Masukan Berbilang (*Multiple Entry Social Visit Pass*) selama tempoh 10 tahun yang boleh diperbaharui. Program ini terbuka kepada semua warga asing yang mempunyai hubungan diplomatik dengan Malaysia tanpa mengira kaum, agama, jantina dan umur. Peserta yang layak

adalah dibenarkan untuk membawa pasangan dan anak yang belum berkahwin di bawah umur 21 tahun yang masih dalam tanggungan.

5. Daripada tahun 2002 hingga 2018, sebanyak 43,943 peserta telah diluluskan penyertaan ke program MM2H. Bagi tahun 2018, sebanyak 6,279 permohonan telah diterima dan sehingga November 2018, 5,011 permohonan telah diluluskan. Daripada 43,943 peserta yang berada di Malaysia, hanya **15% atau 5,108** daripada jumlah tersebut yang membeli rumah di Malaysia dan majoritinya adalah daripada China.

6. Bagi menggalakkan penjualan rumah mewah kepada warga asing, Kementerian Perumahan dan Kerajaan Tempatan (KPKT) telah mengadakan sesi perbincangan dengan pihak urus setia Malaysia MySecond Home (MM2H) Kementerian Pelancongan, Seni dan Budaya Malaysia (MOTAC) pada 24 September 2019 yang lalu bagi menyelaraskan promosi penjualan rumah mewah bernilai RM1 juta dan ke atas yang tidak terjual. Kementerian Dalam Negeri (KDN) turut bekerjasama dengan MOTAC dalam hal melibatkan kemasukan warga asing melalui program MM2H ini. Perbincangan susulan akan diadakan dengan pihak KDN bagi melihat penambahbaikan kepada program MM2H ini khususnya daripada aspek keselamatan negara apabila menerima kemasukan warga asing.

Sekian, terima kasih.

**PEMBERITAHUAN PERTANYAAN
MESYUARAT KETIGA, PENGGAL KEDUA,
PARLIMEN KEEMPAT BELAS
DEWAN RAKYAT MALAYSIA**

PERTANYAAN : JAWAB LISAN

DARIPADA : DATUK ABD RAHIM BIN BAKRI [KUDAT]

TARIKH : 14.11.2019 (KHAMIS)

SOALAN NO. 19

minta **MENTERI PEMBANGUNAN LUAR BANDAR** menyatakan setakat manakah kemajuan komprehensif telah dicapai dalam dua projek ekonomi luar bandar di kawasan Parlimen Kudat iaitu Agropolitan Pulau Banggi yang dilaksanakan oleh FELCRA dan projek menangani kemiskinan ladang getah di Kanibongan Pitas yang dilaksanakan oleh Lembaga Industri Getah Sabah. Apakah kedua-dua projek ini berjaya mencapai matlamat penubuhannya setelah berbelanja jutaan ringgit.

JAWAPAN

Tuan Yang di-Pertua,

Untuk makluman Yang Berhormat, pelaksanaan Projek Agropolitan di Pulau Banggi ini meliputi 3 komponen utama iaitu pembukaan ladang sejahtera, pembinaan petempatan dan pembangunan modal insan yang dilaksanakan oleh FELCRA Berhad. Sebanyak 100 buah rumah telah siap dibina dan telah diduduki di bawah Fasa 1, manakala sebanyak 36 buah rumah sedang dalam peringkat pelaksanaan di bawah Fasa 2 mengalami masalah cerun runtuh di tapak perumahan tersebut. Walau bagaimanapun, masalah cerun telah diselesaikan pada pertengahan tahun 2018. Projek akan disambung semula pada awal tahun 2020 dengan peruntukan sejumlah RM 2 juta. Projek perumahan ini dijangka siap sepenuhnya pada tahun 2021.

Bagi komponen ladang sejahtera, seluas 544 hektar telah ditanam sepenuhnya dengan tanaman getah dan daripada jumlah tersebut, seluas 350 hektar telah ditoreh secara berperingkat dan dijangka dapat ditoreh sepenuhnya pada tahun 2021 melibatkan 100 Ketua Isi Rumah (KIR).

Pelaksanaan komponen infrastruktur lain juga telah siap dilaksanakan antara lain penyediaan infrastruktur asas seperti jalan dalam penempatan, penyambungan bekalan air dan elektrik serta Projek Ameniti Sosial seperti surau, tadika, Medan Infodesa (MID) yang telah memberi manfaat kepada 500 orang isi rumah/penduduk.

Untuk makluman Yang Berhormat jua, Projek Khas Menangani Kemiskinan di Semenanjung Bengkoka, Pitas melibatkan 28 buah kampung dengan keluasan ladang 3,544 hektar. Ladang ini telah mengeluarkan hasil secara berperingkat bermula pada tahun 2011. Sehingga Ogos 2019, seluas 2,856 hektar telah pun ditoreh. Baki kawasan seluas 688 hektar dijangka akan ditoreh pada tahun 2020.

Projek ini telah berjaya memberikan purata pendapatan bulanan sebanyak RM1,400.00 kepada 518 orang peserta yang aktif menoreh sehingga Ogos 2019.

Secara keseluruhan, kedua-dua projek ekonomi di Pulau Banggi dan Pitas ini serta projek-projek prasarana yang dinyatakan, dilihat dapat meningkatkan pendapatan peserta, menyediakan peluang pekerjaan serta dapat meningkatkan taraf hidup peserta di kawasan berkenaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI HASBI BIN HAJI HABIBOLLAH
[LIMBANG]**

TARIKH : 14 NOVEMBER 2019 (KHAMIS)

SOALAN NO. 20

TUAN HAJI HASBI BIN HAJI HABIBOLLAH [LIMBANG] minta **MENTERI KESIHATAN** menyatakan dapatkah Kementerian menyediakan peruntukan untuk melengkapkan NICU di Hospital Limbang.

JAWAPAN

Tuan Yang di-Pertua,

Hospital Limbang merupakan sebuah hospital berpakar minor yang turut merupakan hospital rujukan untuk Hospital Lawas. Buat masa ini Hospital Limbang tidak mempunyai perkhidmatan NICU. Jumlah kelahiran di Hospital Limbang pada tahun 2016 adalah sebanyak 790 kelahiran, pada tahun 2017 adalah sebanyak 750 kelahiran dan pada tahun 2018 pula adalah sebanyak 694 kelahiran. Jumlah penggunaan katil wad paediatric Hospital Limbang pada tahun ini adalah sekitar 70 peratus hingga 88 peratus. Untuk makluman, sehingga bulan Ogos tahun ini, seramai 17 pesakit paediatric terpaksa dirujuk ke Hospital Miri untuk rawatan di NICU. Walau bagaimanapun, perancangan telah dibuat untuk membangunkan NICU di hospital tersebut. Permohonan peruntukan untuk pembangunan tersebut telah dikemukakan kepada Kementerian Hal Ehwal Ekonomi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN SU KEONG SIONG [KAMPAR]

TARIKH : 14 NOVEMBER 2019 [KHAMIS]

SOALAN NO. 21

Minta **MENTERI PERUMAHAN DAN KERAJAAN TEMPATAN** menyatakan strategi Kementerian bagi mengatasi masalah penduduk golongan B40 di kawasan bandar yang tinggal di dalam rumah yang usang atau daif. Adakah Kerajaan mempunyai rancangan atau cadangan untuk menambah jumlah peruntukan bagi skim Program Baik Pulih Rumah Daif di bandar.

JAWAPAN

Tuan Yang di-Pertua,

1. Untuk makluman Yang Berhormat, Program Bantuan Baik Pulih Rumah Daif di Bandar di bawah Kementerian Perumahan dan Kerajaan Tempatan (KPKT) merupakan salah satu strategi Kerajaan untuk menyediakan tempat tinggal yang selamat dan selesa agar dapat dihuni oleh penduduk golongan B40 khususnya yang berhadapan dengan masalah tempat tinggal disebabkan kerosakan kecil atau kerosakan akibat musibah seperti kebakaran, banjir dan ribut. Program ini juga selaras dengan komitmen Kerajaan di bawah *Sustainable Development Goals* (SDGs) 2030, Teras 1: Membasmi Kemiskinan dan Kemakmuran Bersama (2030).

2. Skop bantuan baik pulih ini merangkumi komponen-komponen asas rumah sahaja seperti pembaikan bumbung, dinding, lantai, tingkap dan lain-lain serta tidak melibatkan struktur asas rumah. Kadar baik pulih rumah adalah sebanyak RM13,000.00 untuk Semenanjung Malaysia dan RM15,000.00 bagi Wilayah Persekutuan Labuan/Sarawak/Sabah. Penambahan jumlah peruntukan bagi program ini adalah tertakluk kepada keperluan semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK AHMAD JAZLAN BIN
YAAKUB [MACHANG]
TARIKH : 14 NOVEMBER 2019 (KHAMIS)

SOALAN NO. 22

Y.B. DATUK AHMAD JAZLAN BIN YAAKUB [MACHANG] minta **MENTERI KEWANGAN** menyatakan apakah status terkini Tabung Harapan serta ke manakah duit tabung ini telah digunakan.

JAWAPAN

Tuan Yang di-Pertua,

Pada 16 Mei 2019, YB Menteri Kewangan telah mengeluarkan kenyataan media memaklumkan mengenai status penggunaan dana Tabung Harapan Malaysia (THM) iaitu bagi membayar hutang 1Malaysia Development Berhad (1MDB).

Kenyataan media ini adalah selaras dengan keputusan jawatankuasa yang mentadbir akaun amanah iaitu Jawatankuasa Akaun Amanah THM Bil.1/2019 yang bermesyuarat pada 24 April 2019 bahawa kesemua dana THM yang telah diterima berjumlah RM203,292,117.41 (termasuk faedah pelaburan yang akan diterima) digunakan bagi melunaskan sebahagian hutang 1MDB yang berjumlah RM1.7 bilion bagi tahun 2019 dan pembayaran balik yang perlu dilakukan bagi tujuan akaun amanah ini sahaja. Sehingga akhir-September 2019, sebanyak RM143.8 juta telah dibelanjakan dengan perincian seperti berikut:

Bil.	Penggunaan Dana THM	Tarikh Pembayaran	Jumlah (RM)	Jumlah Dana THM Yang Digunakan (RM)	Status
i.	Melunaskan sebahagian hutang 1MDB - Faedah Bon 1MDB IMTN	30 Mei 2019	143.75 juta	143.75 juta	Selesai
ii.	Bayaran balik cek tak laku	16 Jun 2019	51,500.00	51,500.00	Selesai
iii.	Bayaran balik sumbangan terkhilaf	25 Jun 2019	9,457.49	9,457.49	Selesai
Jumlah dana THM yang telah digunakan (sehingga 1 Oktober 2019)				RM143,810,957.49	

Baki dana dalam THM setakat 12 November 2019 adalah sebanyak RM61,680,261.87. Jumlah ini akan digunakan untuk melunaskan sebahagian pembayaran faedah sukuk 1MDB pada akhir bulan November 2019. Kerajaan dengan ini ingin sekali lagi merakamkan setinggi-tinggi penghargaan buat seluruh rakyat Malaysia yang telah memberikan sumbangan ke dalam THM ini.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 14 NOVEMBER 2019 [KHAMIS]

SOALAN NO. 23

Minta **MENTERI PERUMAHAN DAN KERAJAAN TEMPATAN** menyatakan berapa jumlah rumah PPR (disewa) yang telah dibina di Sabah sejak diperkenalkan pada Februari 2002 bertujuan untuk disewakan kepada golongan sasaran (golongan yang berpendapatan rendah dan setinggan).

JAWAPAN

Tuan Yang di-Pertua,

1. Untuk makluman Yang Berhormat, sejak 2002 sehingga 30 September 2019, Kerajaan telah membina sebanyak 30 projek Program Perumahan Rakyat (PPR) Disewa yang merangkumi 20,799 unit rumah di Negeri Sabah untuk disewakan kepada golongan sasaran seperti warga setinggan dan golongan B40 bagi meringankan beban kewangan mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK WILSON UGAK ANAK KUMBONG
[HULU RAJANG]**

TARIKH : 14 NOVEMBER 2019 [KHAMIS]

SOALAN NO. 24

Minta **MENTERI PERUMAHAN DAN KERAJAAN TEMPATAN** menyatakan sekiranya pihak Kementerian bercadang untuk membina satu balai bomba di Pekan Sungai Asap.

JAWAPAN

Tuan Yang di-Pertua,

1. Untuk makluman Yang Berhormat, kawasan Sungai Asap kini mendapat perlindungan kebakaran oleh Pasukan Bomba Sukarela Uma Daro Liling, Sungai Asap dengan kekuatan 27 orang ahli dan sebuah kenderaan bomba sukarela Proton Arena yang dilengkapi dengan pam angkut bagi kerja-kerja pemadaman. Manakala balai bomba terdekat adalah Balai Bomba dan Penyelamat Bintulu yang terletak 140 kilometer dari kawasan Sungai Asap.

2. Kementerian Perumahan dan Kerajaan Tempatan (KPKT) mengambil maklum terhadap keperluan balai bomba di kawasan Sungai Asap. Pada masa ini, KPKT telah mengenal pasti tapak cadangan yang bersesuaian bagi tujuan perolehan tanah di kawasan tersebut yang dijangka selesai pada tahun 2020. Sehubungan itu, KPKT akan memohon peruntukan bagi pembinaan balai bomba di kawasan Sungai Asap dalam RMKe-12 Tahun 2021. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. PUAN ALICE LAU KIONG YEING
[LANANG]
TARIKH : 14 NOVEMBER 2019 (KHAMIS)

SOALAN NO. 25

Y.B. PUAN ALICE LAU KIONG YEING [LANANG] minta **MENTERI KEWANGAN** menyatakan apakah tindakan yang telah dan akan diambil oleh Kerajaan untuk mengurangkan hutang negara yang mencatat RM1 trilion semasa pemerintahan Kerajaan Kleptokrat tanpa mengabaikan pembangunan kawasan luar bandar.

JAWAPAN

Tuan Yang di-Pertua,

Kerajaan sedang melaksanakan pelbagai langkah bagi memastikan tahap hutang dan pendedahan liabiliti dalam paras yang lebih terkawal. Langkah ini termasuk:

- a. Rasionalisasi ke atas kos projek mega seperti *East Coast Rail Link* (ECRL), MRT2 dan LRT3 yang dapat mengurangkan bebanan komitmen jaminan pada masa hadapan;
- b. Mengenal pasti hutang yang mempunyai kos pembiayaan tinggi yang dapat distruktur semula;
- c. Penubuhan Jawatankuasa Pengurusan Hutang yang berperanan merangka dasar pengurusan hutang yang mampan untuk mengurangkan hutang dalam jangka sederhana dan panjang;
- d. Mendapatkan semula aset berkaitan dengan 1MDB bagi menampung bayaran hutang syarikat tersebut; dan
- e. Meneruskan langkah konsolidasi fiskal bagi mengawal defisit Kerajaan dengan tujuan mengurangkan keperluan membuat pinjaman.

Dalam Belanjawan 2020, peruntukan bagi pembangunan luar bandar meningkat daripada RM9.7 bilion pada 2019 kepada RM10.9 bilion. Antara projek yang akan dilaksanakan termasuk membina jalan perhubungan, menambah baik bekalan air dan elektrik serta program pembangunan keupayaan ekonomi luar bandar.

Kerajaan kekal komited dalam agenda pembangunan negara dan akan memastikan keseimbangan pembangunan serta pembangunan luar bandar tidak terjejas dalam usaha mengurangkan hutang dan pendedahan liabiliti Kerajaan.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB DATO' HAJI CHE ABDULLAH BIN MAT NAWI
KAWASAN : TUMPAT
TARIKH : 14 NOVEMBER 2019 (KHAMIS)

SOALAN :

YB DATO' HAJI CHE ABDULLAH BIN MAT NAWI minta **MENTERI KERJA RAYA** menyatakan perancangan bagi mengatasi kesesakan yang berlaku di bulatan Wakaf Bharu, Tumpat, disebabkan pembinaan 'flyover' jambatan kereta api.

JAWAPAN :

Tuan Yang Di-Pertua,

Untuk makluman Ahli Yang Berhormat, bagi mengatasi kesesakan yang berlaku di Bulatan Wakaf Bharu, Tumpat disebabkan pembinaan 'flyover' dan Jambatan Atas Rel, Pasukan Projek JKR dan Kontraktor Utama (Damakmur (M) Sdn.Bhd.) telah membuka jalan dua (2) lorong satu (1) hala pada sebahagian laluan (Jalan FT134) bermula dari Bulatan Wakaf Bharu menuju Bandar Kota Bharu melalui Jambatan Atas Rel KTMB.

Bagi pengguna dari arah Kota Bharu yang akan ke Wakaf Bharu / Tumpat / Pengkalan Kubor pula, lencongan jalan sehalu akan bermula dari Persimpangan Dusun Langgar hingga Simpang Tiga (3) Jalan Puteri Saadong / Jalan Wakaf Bharu (D164).

Pelaksanaan perubahan pergerakan lalulintas ini telahpun diwartakan melalui Warta Kerajaan Persekutuan oleh Menteri Kerja Raya terhadap Notis Di Bawah Seksyen 70, Akta Pengangkutan Jalan 1987 (Akta 333) no. rujukan P.U (B) 371 bertarikh 29 Julai 2019 dengan tempoh pelaksanaan daripada 14 Ogos 2019 sehingga 31 Mac 2020. Ianya juga telahpun diwar-warkan melalui media massa dan juga media sosial (seperti *Facebook*) oleh pihak Pasukan Projek JKR dan juga Kontraktor untuk makluman pengguna jalan raya di situ.

Selain daripada itu, papan tanda pemberitahuan juga telah dipasang untuk panduan pengguna jalan raya. Di samping itu, Pasukan Kawalan Trafik projek dan dibantu Pasukan Trafik Polis Daerah Tumpat sentiasa bersedia di kawasan berkenaan bagi mengawal lalulintas, sekiranya berlaku sebarang kesesakan lalulintas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' SERI DR. SANTHARA
[SEGAMAT]
TARIKH : 14 NOVEMBER 2019 (KHAMIS)

SOALAN NO. 27

Y.B. DATO' SERI DR. SANTHARA [SEGAMAT] minta **MENTERI KEWANGAN** menyatakan berapa kutipan GST atau cukai-cukai yang seumpama ini yang telah dikutip oleh pihak kastam dan telah diberikan pengecualian, khususnya kepada Papparich dan juga Old Town White Coffee. Nyatakan pelepasan cukai yang telah diberikan sejak 5 tahun yang lepas.

JAWAPAN

Tuan Yang di-Pertua,

Untuk makluman Ahli Yang Berhormat, apa-apa maklumat berkaitan percukaian yang direkod, dihantar dan disimpan di Jabatan Kastam Diraja Malaysia adalah bagi memenuhi keperluan perundangan dan kerahsiaan maklumat ini terjamin serta dilindungi di bawah perundangan GST, cukai jualan dan cukai perkhidmatan. Sehubungan itu, maklumat berkaitan kutipan cukai GST atau cukai lain seperti cukai jualan atau cukai perkhidmatan bagi sesebuah syarikat adalah merupakan maklumat terperingkat dan tidak boleh didedahkan kepada mana-mana pihak.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB DATO' HENRY SUM AGONG
KAWASAN : LAWAS
TARIKH : 14 NOVEMBER 2019 (KHAMIS)

SOALAN :

YB DATO' HENRY SUM AGONG minta **MENTERI KERJA RAYA** menyatakan bilakah pembinaan jalan Lebuhraya Pan Borneo dijalankan di kawasan daerah Lawas dan Limbang, dan di mana laluan atau jajaran sebenarnya jalan tersebut.

JAWAPAN :

Tuan Yang Di-Pertua,

Untuk makluman Ahli Yang Berhormat, Kementerian Kerja Raya (KKR) sedang dalam proses memuktamadkan proses tender bagi Jalan Perhubungan Sarawak-Sabah (*Sarawak-Sabah Link Road*) yang tidak melalui negara Brunei Darussalam dengan jangkaan mula pembinaan pada tahun 2020. Jajaran Jalan Perhubungan Sarawak-Sabah (*Sarawak-Sabah Link Road*) akan dilaksanakan secara berperingkat yang akan merentasi kawasan pedalaman di utara negeri Sarawak, iaitu melibatkan kawasan Baram, Limbang dan Lawas dan seterusnya menghubungkan ke negeri Sabah (Sindumin dan Long Pasia).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]**

TARIKH : 14 NOVEMBER 2019 [KHAMIS]

SOALAN NO. 29

Minta **MENTERI PERUMAHAN DAN KERAJAAN TEMPATAN** menyatakan status terkini perumahan PR1MA di negeri Sabah khususnya dalam daerah Beaufort.

JAWAPAN

Tuan Yang di-Pertua,

1. Untuk makluman Yang Berhormat, secara keseluruhan jumlah unit kediaman perumahan PR1MA di Sabah yang telah diluluskan oleh Anggota Perbadanan dan dimeterai perjanjian adalah berjumlah 8,963 unit iaitu melibatkan 12 projek. Daripada jumlah tersebut, sebanyak 5,220 unit kediaman PR1MA adalah dalam fasa pembinaan manakala sebanyak 3,743 unit kediaman pula masih dalam fasa perancangan.
2. Untuk makluman Yang Berhormat juga, jumlah unit kediaman PR1MA di Beaufort ialah sebanyak 492 unit dan kemajuan pembinaan projek ini telah mencapai tahap 70.30%. Projek ini dijangka siap pada Ogos 2020. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI RICHARD RIOT ANAK JAEM
[SERIAN]**

TARIKH : 14 NOVEMBER 2019 (KHAMIS)

SOALAN NO. 30

DATO' SRI RICHARD RIOT ANAK JAEM [SERIAN] minta **MENTERI KESIHATAN** menyatakan bilakah Projek Pembinaan Klinik Kesihatan (KK3) Serian, Sarawak akan dimulakan, sedangkan tapak tanah telah pun disediakan.

JAWAPAN

Tuan Yang di-Pertua,

Projek Klinik Kesihatan Jenis 3 (KK 3) Serian telah diluluskan oleh Kerajaan untuk dilaksanakan di bawah Rancangan Malaysia Kesepuluh (RMKe-10) pada tahun 2015. Projek ini dilaksanakan oleh Jabatan Kerja Raya Sarawak (JKRS) secara dua (2) Fasa. Fasa Pertama (1) yang melibatkan Kerja Tanah telah bermula pada 1 Disember 2016 dan siap sepenuhnya pada 20 Julai 2017. Fasa Kedua (2) yang melibatkan Kerja Bangunan pula telah ditender pada 14 September 2019 dengan Surat Setuju Terima (SST) dijangka dikeluarkan pada Disember 2019. Tempoh pembinaan dijangka mengambil masa 24 bulan. Kementerian ini berhasrat agar projek ini disiapkan pada masa, kos dan standard yang telah ditetapkan dan Kementerian bersama JKR Sarawak serta Agensi-agensi Kerajaan yang lain sentiasa bekerjasama dengan erat bagi memastikan projek ini disiapkan mengikut tempoh ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI HASANUDDIN
BIN MOHD YUNUS [HULU LANGAT]**

TARIKH : 14 NOVEMBER 2019 [KHAMIS]

SOALAN NO. 31

Minta **MENTERI PERUMAHAN DAN KERAJAAN TEMPATAN** menyatakan dalam keadaan cuaca yang tidak menentu kini, adakah Kementerian berhasrat untuk memperlengkapkan Unit Udara Jabatan Bomba & Penyelamat dengan pesawat pemadam kebakaran CL 415 sepertimana yang telah dimiliki oleh APMU.

JAWAPAN

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) sedang membuat kajian terperinci merangkumi pelbagai pesawat dengan kapasiti yang tinggi serta fungsi-fungsi yang bersesuaian termasuklah pesawat CL 415. Pesawat yang diperlukan hendaklah praktikal dan mempunyai *value for money* bagi pengoperasian pemadaman, *Search and Rescue* (SAR), penyelamatan, pengangkutan, *medevac* dan pemantauan agar sesuai dengan keperluan tugas-tugas kecemasan.

2. Pada masa ini, Unit Udara JBPM dilengkapi dengan 9 buah helikopter. Kesemua helikopter tersebut selain digunakan untuk tujuan penyelamatan, digunakan juga bagi memantau kebakaran. 6 daripadanya juga berfungsi sebagai pesawat pemadam kebakaran.

3. Sepanjang insiden kebakaran hutan yang berlaku di negara ini, kolaborasi di antara JBPM dan Agensi Penguatkuasaan Maritim Malaysia (APMM) telah menunjukkan perkembangan yang positif dalam usaha memadam kebakaran hutan yang melanda. Namun begitu, kesiapsiagaan dan pertambahan aset juga perlu diberi perhatian memandangkan berlakunya kejadian cuaca ekstrem akibat pemanasan global.

Sekian, terima kasih.

**MESYUARAT KETIGA, PENGGAL KEDUA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATUK SERI PANGLIMA DR.
MAXIMUS JOHNITY ONGKILI
[KOTA MARUDU]**

TARIKH : 14.11.2019 (KHAMIS)

SOALAN NO. 32

minta **MENTERI PEMBANGUNAN LUAR BANDAR** menyatakan apakah dasar dan pendekatan baru Kementerian untuk membangun infrastruktur jalan raya di luar bandar Bagi tahun 2019 berapa sasaran jumlah kilometer akan dibina untuk jalan berturap dan jalan kampung tidak berturap dan berapa jumlah peruntukan telah disediakan bagi program jalan desa/kampung bagi tahun 2019.

JAWAPAN

Tuan Yang di-Pertua,

Untuk makluman Yang Berhormat, sebanyak RM860.0juta peruntukan telah diperuntukkan bagi pembangunan jalan raya luar bandar tahun 2019 seluruh Malaysia dengan sasaran 150km jalan yang berturap siap. Sabah khususnya bagi tahun 2019, telah menerima peruntukan sebanyak RM306.9 juta bagi pelaksanaan projek jalan luar bandar dengan sasaran sepanjang 40.00 kilometer disiapkan pada tahun ini. Sehingga 31 Oktober 2019, sepanjang 56.04 kilometer jalan luar bandar telah siap sepenuhnya.

Untuk makluman Yang Berhormat juga, sebanyak RM99.50 juta telah diperuntukkan bagi pelaksanaan Program Jalan Perhubungan Desa (JPD)/jalan kampung bagi tahun 2019 di seluruh negara. Melalui peruntukan tersebut, pihak Kementerian mensasarkan untuk membina/menaiktaraf jalan sepanjang 225.00 kilometer. Negeri Sabah khususnya bagi tahun 2019, telah menerima peruntukan sebanyak RM20.0juta bagi pelaksanaan projek jalan perhubungan desa dengan sasaran sepanjang 40.00 kilometer disiapkan pada tahun ini. Sehingga 31 Oktober 2019, sepanjang 44.46 kilometer jalan perhubungan desa telah siap sepenuhnya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB TUAN CHOW KON YEOW
KAWASAN : TANJONG
TARIKH : 14 NOVEMBER 2019 (KHAMIS)

SOALAN :

YB TUAN CHOW KON YEOW minta **MENTERI KERJA RAYA** menyatakan senarai projek-projek pembinaan dan penaiktarafan bangunan persekutuan serta jalan raya persekutuan yang telah diluluskan di Pulau Pinang sejak 2018. Perincian kos dan jangka masa pelaksanaan projek-projek berkaitan.

JAWAPAN :

Tuan Yang Di-Pertua,

Untuk makluman, terdapat 34 projek bangunan yang telah diluluskan di Pulau Pinang sejak tahun 2018 yang melibatkan sebanyak 12 projek di peringkat perancangan, 4 projek peringkat perolehan dan selebihnya sebanyak 18 projek peringkat pembinaan. Pecahan projek di peringkat pembinaan pula melibatkan 12 bilangan projek bangunan selebihnya sebanyak 6 bilangan projek adalah projek infra. Jumlah kos projek di Pulau Pinang secara keseluruhannya adalah sebanyak RM2,244,181,900.00.

Bagi projek jalanraya pula, terdapat 2 projek menaiktaraf Jalan Persekutuan yang sedang dalam proses pembinaan dari tahun 2017. Kedua-dua projek itu ialah Menaiktaraf Laluan Persekutuan FT001 Dari Persimpangan Permatang Keling (Sek.720) Ke Jambatan Di Atas Sungai Junjung, Simpang Ampat (Sek.740), Daerah Seberang Perai Selatan, Pulau Pinang dan projek Membina Jalan Dari 2 Lorong Ke 4 Lorong Dari Permatang Elong (Sek.773) Hingga Jambatan Merdeka (Sek.782) Seberang Perai Utara, Pulau Pinang. Pada masa kini, kedua-dua projek tersebut sedang dilaksanakan mengikut jadual yang ditetapkan. Secara keseluruhannya, kos projek menaiktaraf jalan Persekutuan di Pulau Pinang yang telah diluluskan adalah sebanyak RM483,390,000.00.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : YB DATUK AARON AGO ANAK DAGANG
KAWASAN : KANOWIT
TARIKH : 14 NOVEMBER 2019 (KHAMIS)

SOALAN :

YB DATUK AARON AGO ANAK DAGANG minta **MENTERI KERJA RAYA** menyatakan sebab mengapa beberapa projek pembinaan infrastruktur seperti Jambatan Igan, Jambatan Pusa dan Jambatan Batang Lupar dibatalkan oleh Kerajaan Pusat. Apakah kesannya terhadap pembangunan kawasan tepi laut / 'coastal areas development' dan keseluruhan pembangunan kawasan luar bandar di Sarawak.

JAWAPAN :

Tuan Yang Di-Pertua,

Untuk makluman Ahli Yang Berhormat sekalian, jambatan-jambatan yang terlibat di bawah bidang kuasa Kerajaan Negeri Sarawak. Kementerian Kerja Raya dimaklumkan bahawa Kerajaan Negeri Sarawak akan meneruskan projek-projek berkenaan. Namun demikian, peruntukan projek-projek jambatan berkenaan telah dipindahkan kepada pembinaan jalan baharu iaitu Projek Jalan Penghubung Sarawak-Sabah atau Sarawak-Sabah Link Road (SSLR). Bagi pembangunan tepi laut / *coastal road development*, program ini merupakan program di bawah Kerajaan Negeri Sarawak. Tumpuan Kerajaan Persekutuan adalah kepada Projek Lebuhraya Pan Borneo bermula dari Telok Melano ke Miri dan SSLR iaitu sebuah jalan raya yang menghubungkan Sarawak dan Sabah tanpa melalui Negara Brunei.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN SU KEONG SIONG [KAMPAR]

TARIKH : 14 NOVEMBER 2019 [KHAMIS]

SOALAN NO. 35

Minta **MENTERI PERUMAHAN DAN KERAJAAN TEMPATAN** menyatakan keberkesanan dan statistik kempen Pemilikan Rumah 2019 (*Home Ownership Campaign*) yang dijalankan oleh Kementerian setakat bulan September 2019. Nyatakan jumlah pemaju-pemaju yang berdaftar dengan REHDA Malaysia untuk mengambil bahagian dalam kempen pemilikan rumah ini dan jumlah bayaran yang diterima oleh REHDA Malaysia untuk pendaftaran dan pensijilan pemaju-pemaju.

JAWAPAN

Tuan Yang di-Pertua,

1. Untuk makluman Yang Berhormat, Belanjawan 2019 yang telah dibentang pada 2 November 2018 menggariskan penganjuran Kempen Pemilikan Rumah Kebangsaan sebagai antara usaha Kerajaan untuk mengurangkan isu hartanah khususnya berkaitan rumah yang belum terjual.
2. Pemaju-pemaju yang menyertai kempen tersebut telah dikenakan bayaran oleh pihak REHDA untuk urusan pendaftaran dan persijilan. Bayaran pendaftaran yang dikenakan adalah RM2,000 bagi setiap

projek. Sehingga kini, sebanyak 898 projek terlibat dan diuruskan oleh REHDA Malaysia (ibu pejabat). Kutipan yang diperolehi sehingga September 2019 adalah berjumlah RM1.79 juta. Manakala bayaran persijilan dikenakan sebanyak RM100 hingga RM200 bagi setiap unit dan diuruskan oleh cawangan REHDA di seluruh Semenanjung Malaysia (11 cawangan).

3. Untuk makluman Yang Berhormat juga, antara kerja-kerja berkos tinggi yang perlu ditanggung oleh pihak REHDA dalam proses pendaftaran dan pensijilan termasuklah:

- i. Membangunkan aplikasi sistem pendaftaran dalam talian; dan
- ii. Bayaran atau kos kakitangan tetap (13 orang) dan kontrak (18 orang).

4. Kakitangan tetap dan kontrak berkenaan diperlukan bagi melaksanakan tanggungjawab seperti berikut:

- i. kerja-kerja menyemak setiap permohonan pendaftaran/pensijilan bagi setiap projek yang berdaftar;
- ii. Menganalisis ketepatan data berhubung jumlah unit, jenis kediaman, lot no., no. mukim, harga jualan sebelum dan selepas diskaun; dan
- iii. Pengesahan Perakuan Penyiapan dan Pematuhan (CCC), diskaun minimum 10% telah diberikan, tarikh Perjanjian Jual Beli (SPA) dalam jangka masa yang ditetapkan dan sebagainya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI DR. HAJI ISMAIL
BIN HAJI ABD. MUTTALIB [MARAN]**

TARIKH : 14 NOVEMBER 2019 [KHAMIS]

SOALAN NO. 36

Minta **MENTERI PERUMAHAN DAN KERAJAAN TEMPATAN** menyatakan apakah langkah-langkah kawalan yang telah dan akan dilakukan oleh Kementerian bagi mengatasi pengimportan haram jutaan tan sisa sampah dari luar negara ke Malaysia dan daripada negara mana.

JAWAPAN

Tuan Yang di-Pertua,

1. Untuk makluman Yang Berhormat, antara langkah-langkah kawalan yang telah dilakukan oleh Kementerian Perumahan dan Kerajaan Tempatan (KPKT) bagi mengatasi pengimportan haram jutaan tan sisa plastik dari luar negara ke Malaysia adalah:

- (i) mengenakan syarat-syarat yang lebih ketat bagi pengimportan sisa plastik HS Code & kod tariff 39.15;
- (ii) mengadakan operasi bersepadu bagi mengetatkan kawalan di pintu masuk Pelabuhan Persekutuan bersama-sama dengan pelbagai agensi kerajaan seperti Jabatan Alam Sekitar (JAS), Jabatan Kastam Diraja Malaysia (JKDM),

Perbadanan Pengurusan Sisa Pepejal dan Pembersihan Awam (SWCorp) dan Pihak Berkuasa Pelabuhan;

- (iii) meneliti isu-isu berkaitan perundangan, peraturan, penguatkuasaan dan kawalan dari semasa ke semasa melalui platform Mesyuarat Jawatankuasa Induk Pengurusan Skrap Plastik Import yang dipengerusikan bersama antara Ketua Setiausaha Kementerian Perumahan dan Kerajaan Tempatan (KPKT) dan Ketua Setiausaha Kementerian Tenaga, Sains, Teknologi, Alam Sekitar dan Perubahan Iklim (MESTECC); dan
- (iv) tindakan penghantaran pulang kontena-kontena yang tidak mematuhi perundangan negara seperti tidak memiliki lesen import (*approved permit* – AP) sisa plastik di bawah kod tarif 39.15 dan sisa plastik yang tidak bersih dan homogen serta melanggar perundangan agensi-agensi lain terutamanya JAS melalui peruntukan perundangan antarabangsa iaitu Konvensyen Basel.

2. Kementerian hanya membenarkan pengimportan sisa plastik yang bersih dan homogen kerana ianya telah melalui proses pengasingan mekanikal terlebih dahulu. Setelah diasing, sisa plastik import tersebut akan dimampat dan dibalut dengan kemas sebelum dihantar ke Malaysia melalui kontena supaya ianya dalam keadaan bersih dan homogen. Antara pembekal sisa plastik yang diluluskan oleh Kementerian berasal dari negara seperti Jepun, Amerika Syarikat, Eropah termasuklah dari negara Timur Tengah yang membekalkan sisa plastik berkualiti tinggi dan bersih seperti *Acrylonitrile butadiene styrene (ABS) lumps* dan *Polyethylene (PE) film*.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN LARRY SOON @ LARRY SNG WEI SHIEN [JULAU]

TARIKH : 14 NOVEMBER 2019 (KHAMIS)

SOALAN

TUAN LARRY SOON @ LARRY SNG WEI SHIEN [JULAU] minta **MENTERI KOMUNIKASI DAN MULTIMEDIA** menyatakan apakah usaha yang dilaksanakan oleh Kementerian untuk meningkatkan ketersambungan internet di kawasan Parlimen Julau terutama sekali di Pekan Pakan dan Pekan Julau.

JAWAPAN

Tuan Yang di-Pertua,

1. Untuk makluman Ahli Yang Berhormat, pihak Kerajaan sentiasa berusaha menambahbaik kualiti perkhidmatan komunikasi di seluruh negara termasuklah di Parlimen Julau.
2. Melalui inisiatif yang dibiayai menerusi Kumpulan Wang Pemberian Perkhidmatan Sejagat (PPS), peluasan Liputan Jalur Lebar Mudah Alih yang merangkumi pembinaan menara komunikasi baharu dan penaiktarafan menara komunikasi sedia ada dengan perkhidmatan jalur lebar mudah alih giat dilaksanakan. Sebanyak 24 menara komunikasi baharu telah siap dibina dan beroperasi dengan liputan 3G/4G manakala 20 lokasi menara sedia ada juga telah dinaiktaraf di Parlimen Julau. Manakala terdapat 2 menara baharu dalam peringkat

pelaksanaan. Ini adalah tambahan kepada 10 menara komunikasi yang dibina secara komersial oleh pemberi perkhidmatan di Parlimen Julau.

3. Pihak Kerajaan juga telah melancarkan Pelan Gentian Optik dan Kesalinghubungan Negara atau National Fiberisation and Connectivity Plan (NFCP”) bagi menambahbaik dan meningkatkan liputan jalur lebar seluruh negara bagi tempoh pelaksanaan selama 5 tahun (2019-2023). Antara sasaran yang telah ditetapkan di bawah NFCP adalah 98% kawasan berpenduduk di Malaysia akan mendapat kelajuan purata 30Mbps menjelang tahun 2023 dengan menggunakan teknologi yang bersesuaian di seluruh negara. Di bawah inisiatif infrastruktur yang akan dilaksanakan di bawah NFCP, terdapat 3 buah menara komunikasi baharu akan dibangunkan di Parlimen Julau.